

16/05/1998

Bersiap hadapi kesan krisis Jakarta

KUALA LUMPUR, Jumaat - Datuk Seri Anwar Ibrahim berkata, negara harus bersiap sedia, berwaspada dan mengambil langkah perlu berikutan perkembangan yang membimbangkan di Indonesia sekarang.

Keadaan yang tidak stabil di republik itu serta kejatuhan nilai rupiah pada paras yang cukup begitu rendah telah menimbulkan keadaan tidak menentu di rantau ini.

"Sebab itu, kita harus lebih bersiap sedia, berwaspada dan mengambil langkah-langkah perlu," katanya pada Perhimpunan Hari dan Konvensyen Belia Negara 1998 di Universiti Malaya di sini hari ini.

Semalam, beliau berkata, kerajaan Malaysia prihatin dengan perkembangan itu dan mengawasi keadaannya dengan lebih dekat lagi.

Anwar yang juga Menteri Kewangan berkata, jika dilihat perkembangan di beberapa negara di rantau ini memang benar ekonomi, pasaran saham dan nilai mata wang mereka jatuh akibat spekulasi dan manipulasi asing selain kerana pincangnya sistem kewangan antarabangsa.

Sehubungan itu, beliau menyokong desakan Perdana Menteri, Datuk Seri Dr Mahathir Mohamad mengenai perlunya perubahan dalam arkitektur sistem kewangan antarabangsa supaya lebih adil kepada negara kecil dan miskin.

Isu itu turut dibahaskan oleh Bank Dunia, Tabung Mata Wang Antarabangsa (IMF) serta beberapa negara maju.

(END)